



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA TANO

Kikao cha Kumi na Tatu – Tarehe 03 Machi, 2017.

Kikao Kitaanza Saa 3.00 (Tatu) Asubuhi
na Dua zitasomwa.

I. HATI ZA KUWASILISHA MEZANI:

Ofisi ya Rais, Katiba, Sheria, Utumishi wa Umma na Utawala Bora:

Mswada wa Sheria ya (Marekebisho) ya Sheria ya Maadili ya Viongozi wa Umma Nam. 4 ya Mwaka 2015.

II. MASWALI:

Wizara ya Ardhi, Maji, Nishati na Mazingira:

93. MHESHIMIWA ABDALLA MAULID DIWANI (Jimbo la Jang'ombe) - Atamuuliza Mheshimiwa Waziri wa Ardhi, Maji, Nishati na Mazingira:

Kutokana na ahadi nyingi zinazotolewa na Shirika la Umeme Zanzibar kuhusu shughuli nzima ya kuungiwa umeme kwa siku 21 baada ya kufanya malipo ya kuunganishiwa umeme.

- a) Je, Shirika litawajibika vipi kwa kushindwa kuunga umeme ndani ya muda waliouweka wenyewe wa siku 21.
- b) Je, Shirika liko tayari kulipa fidia kwa wananchi waliochelewa kuungiwa umeme.

Wizara ya Kilimo, Maliasili, Mifugo na Uvuvi :

31. MHESHIMIWA ABDALLA MAULID DIWANI (Jimbo la Jang'ombe) - Atamuuliza Mheshimiwa Waziri wa Kilimo, Maliasili, Mifugo na Uvuvi:

Jitihada za wananchi kutengeneza nyumba bora zimeathiriwa sana na tatizo la upatikanaji wa rasilimali ya mchanga ambao ndio nyenzo kubwa katika ujenzi huo na kupelekea usumbufu wa upatikanaji wake.

Je, Wizara yako inatoa tamko gani kuhusu kadhia hii ya kukosekana mchanga.

Wizara ya Ujenzi, Mawasiliano na Usafirishaji:

36. MHESHIMIWA DKT. MAKAME ALI USSI (Jimbo la Mtopepo) - Atamuuliza Mheshimiwa Waziri wa Ujenzi, Mawasiliano na Usafirishaji:

Kwa kuwa usafiri wa kwenda na kurudi katika sehemu zilizotenganishwa na bahari unaweza kurahisishwa kwa kutanua eneo la ardhi kwa kufukia bahari na kujenga miundombinu inayostahiki.

a) Je, Wizara yako ina mpango gani unaolenga kurahisisha usafiri wa kwenda na kurudi katika sehemu zilizotenganishwa na bahari kwa masafa mafupi ambamo bado vinatumika vyombo vya baharini vinavyotumia muda mrefu.

b) Je, Wizara yako haioni haja ya kuanza kufikiria utaratibu wa kufukia sehemu zilizokwisha kuvamiwa na bahari kwa kushirikiana na taasisi zinazohusika kwa kujenga miundombinu husika ili kurahisisha usafiri katika sehemu hizo.

82. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Ujenzi, Mawasiliano na Usafirishaji.

Ruhusa za madereva na gari ikimaanisha leseni na ruhusa nyengine kama vile beji, hutolewa na kukaguliwa na Wizara ya Mawasiliano kupitia Idara ya Leseni. Baada ya kutoa na kukagua leseni hizo, idara hiyo haihusiki

tena na sheria zake husimamiwa na polisi kwa asilimia 100% na kesi hupelekwa mahakamani bila kushirikishwa kwa idara hiyo.

- a) Je, Serikali haioni umuhimu wa suala la gari na madereva baada ya kukamatwa kupelekwa Idara ya Leseni na wao ndio wakaandae kesi na kuipeleka mahakamani badala ya polisi kusimamia masuala hayo kwa asilimia 100%.
- b) Je, Serikali haioni tatizo la kutoa leseni na ukaguzi wa vyombo vya usafiri huku ikitokea ajali au uvunjaji wa sheria ya masuala hayo ikasimamiwa na polisi badala ya idara husika.

Wizara ya Afya

22. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Afya.

Kwa kuwa hivi sasa wananchi wamehamasika na wamekuwa wakijiunga kwa wingi katika mifuko ya Bima ya Afya ambayo tunaamini ina faida kubwa hasa kwa wananchi wa kipato cha chini. Hata hivyo, kwa upande wa wananchi wa Pemba kumekuwa na usumbufu wa upatikanaji wa huduma za afya kwa kutumia bima ya afya hasa katika hospitali za Serikali.

- a) Je, huduma ya Bima ya Afya inatumika katika vituo vingapi huko Pemba.
- b) Kwa nini Serikali isiimarisha utaratibu wa kutoa huduma za afya kwa kutumia Bima ya Afya katika hospitali zake za Abdalla Mzee, Chake Chake na Wete wakati huduma hii inaonekana kuimarika zaidi katika vituo vya watu binafsi.

100. MHESHIMIWA OMAR SEIF ABEID (Jimbo la Konde)- Atamuuliza Mheshimiwa Waziri wa Afya.

Kwa kuwa katika Hospitali ya Micheweni kumejengwa chumba cha upasuaji kutokana na michango na msaada kutoka Serikali ya Japan kwa ajili ya kurahisisha huduma ya upasuaji. Na kwa kuwa jengo lipo kwenye hatua za mwisho kukamilika kwake.

- a) Je, Serikali itaukamilisha lini ujenzi wa jengo hilo pamoja na vifaa vya kutendea kazi ili lianze kutumika na kuwapunguzia kero wananchi wa Wilaya ya Micheweni kufuata huduma hiyo katika Hospitali za Wete, Chake Chake na Mkoani.
- b) Je, Serikali haioni kwamba kutolikamilisha jengo hilo na kuanza kufanya kazi kunaweza kusababisha wahisani wanaotusaidia wakashindwa kutupa msaada mwengine kwa sababu wao walishatusaidia fedha nyingi na matokeo yake bado jengo hilo halijakamilika.

III. **UCHAGUZI WA MJUMBE WA TUME YA BAJETI YA BARAZA LA WAWAKILISHI:**

IV. **HOJA ZA SERIKALI:**

Ofisi ya Rais, Katiba, Sheria, Utumishi wa Umma na Utawala Bora:

Mswada wa (Marekebisho) ya Sheria ya Maadili ya Viongozi wa Umma Nam. 4 ya Mwaka 2015 – Kusomwa kwa Mara ya Kwanza.

Zanzibar,
03 Machi, 2017.

(Raya Issa Msellem)
KATIBU WA BARAZA